

醫宗金鑑

卷六至
卷十四

御纂醫宗金鑑卷六

訂正仲景全書傷寒論註

辨太陰病脈證并治全篇 六氣之邪感入雖同人受之而生病各異者何也蓋以人之形有厚薄氣有盛衰藏有寒熱所受之邪每從其人之藏氣而化故化故生病各異也是以或從虛化或從實化或從寒化或從熱化譬諸水火水盛則火滅火盛則水耗物盛從化理固然也誠知乎此又何疑乎陽邪傳陰變寒化熱而遂以爲奇耶自後漢迄今千載以來皆謂三陰寒邪不傳且以傷寒傳經陰邪謂爲直中抑知直中乃中寒之證非傳經之邪耶是皆未曾熟讀仲景之書故有此誤耳如論中下利腹脹滿身體疼痛者先溫其裏乃攻其表溫裏宜四逆湯攻表宜桂枝湯此三陽陽邪傳入太陰邪從陰化之寒證也如少陰病下利白通湯主之此太陰寒邪傳少陰之寒證也如下利清穀裏寒外熱汗出而厥者通脈四逆湯主之此少陰寒邪傳厥陰之寒證也皆歷歷可據豈得謂傷寒陰不相傳無陽從陰化之理乎夫太陰溼土純陰之藏也故病一入太陰則邪從陰化者多從陽化者少從陰化者如論中腹滿吐食自利不渴手足自溫時腹自痛宜服理中四逆輩者是也從陽化者如論中發汗後不解腹滿痛者急下之宜大承氣湯腹滿大實痛者宜桂枝加大黃湯主之者是也蓋脾與胃同處腹中故腹滿腹痛兩皆有有之然腹滿爲太陰主病心下滿爲陽明主病其陽明亦有腹滿者以陽明腹滿與熱同化故必有潮熱自汗不大便之證而不似太陰與溼同化有發黃暴煩下利穢腐之證也誠能更於腹之時痛大實痛腹滿痛處詳審虛實斟酌溫下則了無餘義矣故以此括之自知太陰之要法也○太陰之爲病腹滿而吐食不下自利益甚時腹自痛若下之必胸下結鞭（按）吳人駒曰自利益甚四字當在必胸下結鞭句之下其說甚是若在吐食不下句之下則是已吐食不下而自利益甚矣仲景復曰若下之無所謂也（註）太陰脾經也其脈布胃中絡於噤寒邪傳於太陰故腹滿時腹自痛寒邪循脈犯胃故吐食不下此太陰裏虛邪從寒化之證也當以理中四逆輩溫之若腹滿噤乾不大便大實痛始爲太陰裏實邪從熱化之證當以桂枝加大黃湯下之矣若以太陰

虛寒之滿痛而誤認爲太陰實熱之滿痛而下之則寒虛相搏必變爲藏結痞鞭及自利益甚矣此太陰病全篇之提綱後凡稱太陰病者皆指此證而言也〔集註〕程應旆曰陽邪亦有腹滿得吐則滿去而食可下者今腹滿而吐食不下則滿爲寒脹吐爲寒格也陽邪亦有下利腹痛得利則痛隨利減者今下利而時腹自痛則利爲寒利痛爲寒痛也曰胸下陰邪結於胸下之陰分異於陽邪結胸之在胸且按之而痛也曰結鞭無陽以化氣則爲堅陰異於痞之滯而裏也彼皆陽從上陷而阻留此則陰從下逆而不歸寒熱大別也 吳人駒曰自利有時而腹自痛非若積蓄而常痛者若以諸痛爲實從而下之其滿益甚必令胸下皆爲結鞭而自利益甚矣 傷寒四五日腹中痛若轉氣下趨少腹者此欲自利也〔註〕傷寒四五日邪入太陰之時也腹中痛若不轉氣下趨者屬陽明也今腹中痛轉氣下趨少腹者乃太陰欲作自利之候也此仲景示人不可以諸痛爲實而妄議下之意也〔集註〕方有執曰腹中痛轉氣下趨者裏虛不能守而寒邪下迫也 張璐曰腹痛亦有屬火者其痛必自下而上攻若痛自上而下趨者定屬寒痛無疑矣 魏荔彤曰此重在預防下利而非辨寒熱也玩若字欲字可見其辨寒邪者自有別法○自利不渴者屬太陰以其藏有寒故也當溫之宜服四逆輩〔註〕凡自利而渴者裏有熱屬陽也若自利不渴則爲裏有寒屬陰也今自利不渴知爲太陰本藏有寒也故當溫之四逆輩者指四逆理中附子等湯而言也〔集註〕程知曰言太陰自利爲寒宜溫者也少陰屬腎水熱入而耗其水故自利而渴太陰屬脾土寒入而從其溼則不渴而利故太陰自利當溫也 程應旆曰三陰同屬藏寒少陰厥陰有渴證太陰獨無渴證者以其寒在中焦總與龍雷之火無涉少陰中有龍火底寒甚則龍升故自利而渴厥陰中有雷火故有消渴太陽一照雷雨收聲故發熱則利止見厥而復利也 魏荔彤曰自利二字乃未經誤下誤汗誤吐而成者故知其藏本有寒也

理中圓方

人參

白朮

甘草 炙

乾薑 各三兩

以上四味擣篩蜜和爲丸如雞子黃許大以沸

湯數合和一丸研碎溫服之日三四夜二服腹中未熱益至三四丸然不及湯湯法以四物依兩數切用水八升煮取三升去滓溫服一升日三服

加減法

若臍上築者腎氣動也去朮加桂四兩吐多者去朮加生薑三兩下多者還用朮悸者加茯苓二兩渴欲得水者加朮足前成四兩半腹中痛者加人參足前成四兩半寒者加乾薑足前成四兩半腹滿者去朮加附子一枚服湯後如食頃飲熱粥一升許微自溫勿發揭衣被

〔集解〕程應旆曰陽之動始於溫溫氣得而穀精運穀氣升而中氣贍故名曰理中實以燮理之功予中焦之陽也蓋謂陽虛卽中氣失守膈中無發宣之用六府無灑陳之功猶如釜薪失焰故下至清穀上失滋味五藏凌奪諸證所由來也參朮炙草所以守中州乾薑辛以溫中必假之以燃釜薪而騰陽氣是以穀入於陰長氣於陽上輸華蓋下攝州都五藏六府皆受氣矣此理中之旨也若水寒互勝卽當脾腎雙溫加之以附子則命門益而土母溫矣白朮補脾得人參則壅氣故臍下動氣吐多腹滿皆去朮也加桂枝以伐腎邪加生薑以止嘔也加附子以消陰也下多者溼勝也還用朮燥溼也渴欲飲水飲渴也加朮使飲化津生也心下悸停水也加茯苓導水也腹中痛倍人參虛痛也寒者加乾薑寒甚也傷寒本自寒下醫復吐下之寒格更逆吐下若食入口卽吐乾薑黃連黃芩人參湯主之〔按〕經論中並無寒下之病亦無寒下之文玩本條下文寒格更逆吐下可知寒下之下字當是格字文義始相屬註家皆釋胃寒下利不但文義不屬且與芩連之藥不合〔註〕經曰格則吐逆格者吐逆之病名也朝食暮吐脾寒格也食入卽吐胃熱格也本自寒格謂其人本自有朝食暮吐寒格之病也今病傷寒醫見可吐可下之證遂執成法復行吐下是寒格更逆於吐下也當以理中湯溫其太陰加丁香降其寒逆可也若食入口卽吐則非寒格乃熱格也當用乾薑人參安胃黃連黃芩降胃火也

乾薑黃連黃芩人參湯方

乾薑

黃連

黃芩

人參各三兩

以上四味以水六升煮取二升去滓分溫再服

傷寒醫下之續得下利清穀不止身疼痛者急當救裏後身疼痛清便自調者急當救表救裏宜四逆湯救表宜桂枝湯〔註〕傷寒醫不分表裏寒熱虛實而誤下之續得下清穀利不止者寒其裏也雖有通身疼痛之表未除但下利清穀不止裏寒已盛法當急救其裏俟便利自調仍身疼痛不止再救其表可也救裏宜四逆湯溫中勝寒救表宜桂枝湯調榮和衛也〔集註〕王三陽曰此證當照顧協熱利須審其利之色何如與勢之緩急不可輕投四逆桂枝也喻昌曰攻裏必須先表後裏始無倒行逆施之患惟在裏之陰寒極盛不得不急救其裏俟裏證稍定仍救其表蓋謂救裏後再行救表也下利清穀太陰寒邪已傳少陰即有身痛不可攻表若誤攻其表即使汗出太陽表解而太陰寒凝必脹滿矣下利腹脹滿身體疼痛者先溫其裏乃攻其表溫裏宜四逆湯攻表宜桂枝湯〔註〕此承上條互發其證以明先裏後表之治也下利腹脹滿者裏寒邪也身體疼痛者表寒邪也凡表裏寒邪之證同見總以溫裏爲急故當先溫其裏後攻其表溫裏宜四逆湯攻表宜桂枝湯〔集註〕方有執曰裏虛表實惟其虛也故必先之惟其實也故可後焉發汗後腹脹滿者厚朴生薑半夏甘草人參湯主之〔註〕發汗後表已解而腹滿者太陰裏虛之脹滿也故以厚朴生薑甘草半夏人參湯主之消脹散滿補中降逆也〔集註〕成無己曰吐後脹滿與下後脹滿皆爲實者言邪氣虛入裏而爲實也發汗後則外已解腹脹滿知非裏實由太陰不足脾氣不通故壅而爲滿也與此湯和脾胃而降逆氣宜矣汪琥曰此條乃汗後氣虛腹脹滿其人雖作脹滿而內無實形所以用人參炙甘草等甘溫補藥無疑也張錫駒曰此言發汗而傷其脾氣也脾主腹故腹滿爲太陰主病發汗後而腹脹滿則知其人脾氣素虛今脾氣愈虛則不能轉輸濁氣不降清氣不升而脹滿作矣厚朴生薑半夏甘草人參湯方

厚朴

半升

生薑

半斤

半夏

半升

甘草二兩

人參一兩

以上五味以水一斗煮取三升

去滓溫服一升日三服

發汗不解腹滿痛者急下之宜大承氣湯腹滿不減減不足言當下之宜大承氣湯〔註〕此詳申上條互發其義以別其治也發汗後表已解腹滿不痛者乃腹滿時減減復如故之虛滿也當溫之厚朴生薑半夏甘草人參湯證也今發汗後表不解腹滿大痛者乃腹滿不減減不足言之實滿也當下之宜大承氣湯蓋以裏急先攻裏後和表也〔集註〕喻昌曰減不足言四字形容腹滿如繪見滿至十分即減去一二分不足殺其勢也此所以縱有外邪未解而當下無疑耳程應旆曰下之而腹滿如故即減去一二分算不得減下之不妨再下必當以減盡爲度也劉宏璧曰太陰無可下之法也設在經則各經已無可下之理在藏則太陰尤無受下之處桂枝加大黃湯安能無疑乎不知脾與胃相表裏也太陽誤下太陰受邪適胃有宿食則脾因胃之實而實亦即因太陽之邪而痛矣既大滿大痛已成胃實又非此湯之所能治故宜大承氣湯也○太陰病脈浮者可發汗宜桂枝湯〔註〕太陰經病脈當浮緩太陰藏病脈當沉緩今邪至太陰脈浮不緩者知太陽表邪猶未全罷也故即有吐利不食腹滿時痛一二證其脈不沉而浮便可以桂枝發汗先解其外俟外解已再調其內可也於此又可知論中身痛腹滿下利急先救裏者脈必不浮矣〔集註〕王肯堂曰病在太陽脈浮無汗宜麻黃湯此脈浮當亦無汗而不言者謂陰不得有汗不必言也不用麻黃湯而用桂枝湯蓋以三陰兼表病者俱不當大發汗也須識無汗亦有用桂枝者程知曰此言太陰宜散者也太陰病謂有腹痛下利證也太陽脈尺寸俱浮今脈浮則邪還於表可知矣故宜用桂枝解散不用麻黃者陰病不得大發其汗也桂枝湯有和裏之意焉程應旆曰此太陰中之太陽也雖有裏病仍從太陽表治方不引邪入藏○本太陽病醫反下之因而腹滿時痛者屬太陰也桂枝加芍藥湯主之大實痛者桂枝加大黃湯主之〔註〕本太陽中風病醫不以桂枝湯發之而反下之因而邪陷入裏餘無他證惟腹滿時痛者此屬太陰裏虛痛也故宜桂枝加芍藥湯以外解太陽之表而內調太陰之裏虛也若大滿實痛則屬太陰熱化胃實痛也故宜桂枝加大黃湯以外解太陽之表而內攻太陰之裏實也〔集註〕趙嗣真

曰太陰腹滿證有三有次第傳經之邪有直入中寒之邪有下後內陷之邪不可不辨 喻昌曰太陽病之誤下其變皆在胸脅以上此之誤下而腹滿時痛無胸脅等證則其邪已入陰位所以屬在太陰也仍用桂枝解肌之法以升發太陽之邪倍芍藥者以調太陰之氣本方不增一藥斯爲神耳大實大滿宜從急下然陽分之邪初陷太陰未可峻攻但於桂枝湯中少加大黃七表三裏以分殺其邪與大柴胡湯同其義也 程應旂曰誤下太陽而成腹滿時痛太陰之證見矣然表邪內陷留滯於太陰非藏寒病也仍用桂枝湯升發陽邪但倍芍藥以調和之倘大實而痛於證似可急下然陰實而非陽實仍從桂枝例升發陽邪但加大黃以破結滯之物使表裏兩邪各有去路則寒隨實去不溫而自溫矣然此二證雖屬之太陰實從太陽傳來則脈必尙浮可知

桂枝加芍藥湯方

於桂枝湯方內更加芍藥三兩隨前共六兩餘依桂枝湯法

桂枝加大黃湯方

桂枝 三兩

大黃 二兩

芍藥 六兩

甘草 三兩

生薑 三兩

大棗 十二枚

以上六味以水

七升煮取三升去滓溫服一升日三服

〔集註〕柯琴曰腹痛爲太陰陽明俱有之證然位同而職異太陰主出太陰病則腐穢氣凝不利故滿而時痛陽明主內陽明病則腐穢燥結不行故大實而痛是知大實痛是陽明病而非太陰病矣仲景因表證未解陽邪已陷入太陰故倍芍藥以益脾調中而除腹滿之時痛此用陰和陽法也若表邪未解而陽邪陷入陽明則加大黃以潤胃通結而除其大實之痛此雙解表裏法也凡妄下必傷胃之氣液胃氣虛則陽邪襲陰故轉屬太陰胃液涸則兩陽相搏故轉屬陽明屬太陰則腹滿時痛而不實陰道虛也屬陽明則腹滿大實而痛陽道實也滿而時痛是下利之兆大實而痛是燥屎之徵故倍加芍藥小變建中之劑少加大黃微示調胃之方也○太陰爲病脈弱其人續自便利設當行大黃芍藥者宜減之以其人胃氣弱易動故也〔註〕太陰爲病必腹滿而痛治之之法

當以脈消息之。若其人脈弱，則其中不實。雖不轉氣下趨少腹，然必續自便利。設當行大黃芍藥者，宜減之以胃氣弱，難堪峻攻，其便易動故也。由此推之，可知大便鞭者，不論在陰在陽，凡脈弱皆不可輕下也。〔集註〕程知曰：此言太陰脈弱，恐續自利，雖有腹痛，不宜用攻，與建中湯相發明也。喻昌曰：此段叮嚀，與陽明篇中互相發明。陽明曰：不轉失氣曰先鞭後瀉，曰未定成鞭，皆是恐傷太陰脾氣。此太陰證而脈弱，恐續自利，雖有腹痛，減用大黃芍藥，又是恐傷陽明胃氣也。汪琥曰：或問大黃能傷胃氣，故宜減芍藥，能調脾陰，何以亦減之？答曰：脈弱則氣餒不充，仲景以溫甘之藥能生氣，芍藥之味酸寒，雖不若大黃之峻，要非氣弱者所宜多用，故亦減之。傷寒脈浮而緩，手足自溫者，繫在太陰。太陰當發身黃，若小便自利者，不能發黃。至七八日，雖暴煩下利，日十餘行，必自止，以脾家實，腐穢當去故也。〔註〕傷寒脈浮而緩，手足熱者，爲繫在太陽。今手足溫，故知繫在太陰也。太陰屬溼，溼與熱瘴當發身黃，小便自利者，則溼不蓄熱不瘴，故不能發黃也。若至七八日，大便鞭，則爲轉屬陽明。今既不鞭，雖暴煩下利，日十餘行，必當自止何也？以脈浮緩，手足溫，知太陰脾家素實，邪不容腐穢當去故也。〔集註〕程知曰：言自利之證，脈浮緩，手足溫，則爲脾實也。太陰脈本緩，故浮緩雖類太陽中風，而手足自溫，則不似太陽之發熱，更不似少陰厥陰之厥逆，所以爲繫在太陰也。太陰溼熱相蒸，勢必發黃，然小便利，則溼下泄而不發黃矣。此雖暴煩，頻利，有似少陰之證，然其利當自止，所以然者，以脈浮緩，手足溫，知其人脾氣實，而非虛寒之比。其溼熱所積之腐穢，自當逐之而下也。若不辦晰，而以四逆法治之，則誤矣。程應旂曰：太陰得浮緩，手足溫之脈證，則胃陽用事，自無藏寒之痛。陰鬱或有之，小便不利，必發黃。雖發黃不爲陰黃，若小便自利者，不能發黃。陰欲鬱而陽必驅，至七八日，雖暴煩下利，日十餘行，必自止，所以然者，脈不沉且弱，而浮緩，手足不涼而自溫，陰得陽以周護，則不寒不虛，是爲脾家實也。經曰：陽道實，陰道虛，陰行陽道，豈肯容邪久住？此則腐穢當去故耳。汪琥曰：下利煩躁者死，此爲先利而後煩，是正氣脫而邪氣擾也。茲則先煩後利，是脾家之正氣實，故不受邪而與之爭，因暴發煩熱也。太陰中風，四肢煩痛，陽微陰濇而長者爲欲愈。〔註〕太陰中風者，謂此太陰病。

是從太陽中風傳來者故有四肢煩疼之證也陰陽以浮沉言夫以浮微沉濇之太陰脈而兼見陽明之長脈則爲陰病陽脈藏邪傳府故爲欲愈也〔集註〕程知曰傷寒陰邪也故自利宜用四逆傷風陽邪也故煩痛見於四肢凡太陰病脈浮者多是太陰中風 喻昌曰微濇之中更察其脈之長而不短知元氣未漓其病當自愈也太陰病欲解時從亥至丑上〔註〕邪之解也必於所旺之時亥子丑乃太陰所旺之時也當此旺時故不能勝而自解矣

音切

趨七句切

揭音計

腐音府

穢於廢切

御纂醫宗金鑑卷七

訂正仲景全書傷寒論註

辨少陰病脈證并治全篇

少陰腎經水火之藏邪傷其經隨人虛實或從水化以爲寒或從火化以爲熱水化

爲陰寒之邪是其本也火化爲陽熱之邪是其標也陰邪其脈沉細而微陽邪其脈沉細而數至其見證亦各有

別陰邪但欲寐身無熱陽邪雖欲寐則多心煩陰邪背惡寒口中和陽邪背惡寒則口中燥陰邪咽痛不腫陽邪

咽痛則腫陰邪腹痛下利清穀陽邪腹痛下利清水或便膿血也陰邪外熱面色赤裏寒大便利小便白陽邪外

寒手足厥裏熱大便秘小便赤此少陰標本寒熱之脈證也凡從本之治均宜溫寒回陽從標之治均宜攻熱救

陰回陽救陰其機甚微總在臨證詳究辨別標本寒熱以急施其治庶克有濟稍緩則不及矣○少陰之爲病脈

微細但欲寐也〔註〕少陰腎經陰盛之藏也少陰受邪則陽氣微故脈微細也衛氣行陽則寤行陰則寐少陰受

邪則陰盛而行陰者多故但欲寐也此少陰病之提綱後凡稱少陰病者皆指此脈證而言也〔集註〕方有執曰

少陰腎經也居於極下其脈起於小趾之下靈樞曰是主所生病者嗜臥但欲寐蓋人肖天地天地之氣行於陽

則闢而曉行於陰則闔而夜故人之氣行於陽則動而寤行於陰則靜而寐凡病人但欲寐者邪客於陰故也

張璐曰此言少陰之總脈總證也蓋少陰屬水主靜即使熱邪傳至其經在先之脈雖浮大此時亦必變爲沉細

在先之證雖煩熱不寧此時亦必變爲昏沉嗜臥但須辨出脈細沉數口中燥爲熱證脈沉微細口中和爲寒證

以此明辨萬無差誤矣程應旆曰凡陰脈皆沉異乎太陽之浮不必言矣陽明脈大微者大之反少陽脈弦細

者弦之反沉兼微細陰證定矣○少陰病始得之反發熱脈沉者麻黃附子細辛湯主之〔註〕少陰病謂但欲寐

也脈沉者謂脈不微細而沉也今始得之當不發熱而反發熱者是爲少陰之裏寒兼有太陽之表熱也故宜麻

黃附子細辛湯溫中發汗顧及其陽則兩感之寒邪均得而解之矣〔集註〕方有執曰發熱邪在表也脈沉少陰

位北而居裏也以其居裏邪在表而發熱故曰反也以邪在表不在裏故用麻黃以發之以其本陰而標寒故用

附子以溫之細辛辛溫過於少陰用之以佐主治者以其專經而爲向導也 程知曰三陰表法與三陽不同三陰必以溫經之藥爲表而少陰尤爲緊關故用散邪溫經之劑俾外邪之深入者可出而內陽亦不因之外越也 程應旆曰一起病便發熱兼以陰經無汗世有計日按證者類能用麻黃而忌在附子不知脈沉者由其人腎經素寒裏陽不能協應故沉而不能浮也沉屬少陰不可發汗而始得病時卽發熱則兼太陽又不得不發汗須以附子溫經助陽託住其裏使陽不至隨汗而越其麻黃始可合細辛用耳 林瀾曰傳邪與陰寒皆有沉脈沉但可爲病之在裏而未可專以沉爲寒也夫少陰證中微細而沉與細數而沉其爲寒熱之殊蓋大有別矣

麻黃附子細辛湯方

麻黃二兩

去節

細辛二兩

附子

一枚炮去
皮破八片

以上三味以水一斗先煮麻黃減二升去上沫內諸藥

煮取三升去滓溫服一升日三服

少陰病得之二三日麻黃附子甘草湯微發汗以二三日無裏證故微發汗也〔註〕此詳上條少陰病得之二三日仍脈沉發熱不解者宜麻黃附子甘草湯微發其汗也蓋謂二三日不見吐利裏寒之證知邪已衰然熱仍在外尙當汗之但不可過耳故不用細辛而用甘草蓋於溫散之中有和意也此二證皆未曰無汗非仲景略之也以陰不得有汗不須言也〔集註〕張璐曰少陰無發汗之法汗之必至亡陽惟此一證其外有太陽發熱無汗其內不吐利躁煩嘔渴乃可溫經散寒取其微似之汗也 程應旆曰旣云微發汗矣仍用以字故字推原之足見鄭重之意按此二條與太陽篇發熱頭痛脈沉用四逆者同一證彼以不差則期過三日可知病已入裏雖尙冒太陽頭痛直以少陰法律之此少陰病在初得二三日雖無頭痛證不容竟作少陰治之故仍兼太陽之法以律之一出一入不啻爰書假令前條得之二三日後二條過二三日不差則四逆之與麻黃易地皆然矣 汪琥曰上條反發熱脈沉此亦反發熱脈沉但上言始得之爲急此言得之二三日爲緩病勢稍緩治法亦緩 麻黃附子甘草湯方

麻黃二兩

附子一枚炮去甘草二兩

以上三味以水七升先煮麻黃一兩沸去上沫內諸藥煮取三

升去滓溫服一升日三服

〔集解〕柯琴曰彼太陽病而脈反沉便用四逆以急救其裏是裏寒陰盛也此少陰脈而表反熱便於表劑中加附子以預固其陽是表熱陽衰也夫以發熱無汗太陽之表脈沉但欲寐少陰之裏設用麻黃開腠理細辛散浮熱而無附子以固元陽則太陽之微陽外亡惟附子與麻黃並用則寒邪散而陽不亡此裏病及表脈沉而當發汗者與病在表脈浮而發汗者迥庭也若表微熱則受寒亦輕故以甘草易細辛而微發其汗甘以緩之與辛以散之者又少間矣○少陰病脈微不可發汗亡陽故也陽已虛尺脈弱濇者復不可下之〔註〕少陰病脈微雖有發熱亦爲少陰裏寒外熱非太陽發熱者可比故不可發汗發汗則亡陽然陽已虛津液已涸即見少陰口燥咽乾可下之證若尺脈弱濇者復不可下之又恐亡陰也〔集註〕方有執曰微者陽氣不充故曰無陽無陽則化不行故汗不可發也尺以候陰弱濇者陰血不足也故謂復不可下其當亟行溫補又可知矣程應旆曰少陰多自利證人固無肯輕下者但拈出尺脈弱濇字則少陰之有大承氣湯證其尺脈必強而滑已伏見於此處矣○病人脈陰陽俱緊反汗出者亡陽也此屬少陰法當咽痛而復吐利〔註〕病人脈陰陽俱緊發熱無汗者太陽傷寒證也發熱汗出不止者太陽亡陽證也今脈緊無熱而反汗出此屬少陰然少陰證法當咽痛而復吐利也上條脈微無汗不可發汗者是以脈爲主也此條有汗脈緊不可發汗者是以證爲主也從脈從證不可不察〔集註〕程知曰陰陽俱緊傷寒之脈也法當無汗而反汗出太陽之陽外亡也若以少陰亡陽之證而認爲太陽中風之證則誤矣少陰之寒上逼則咽痛而吐下逼則下利也○少陰病脈緊至七八日自下利脈暴微手足反溫脈緊反去者爲欲解也雖煩下利必自愈〔註〕此承上條互發其義以別陰陽寒熱也少陰病脈沉微細寒邪脈也脈沉數細熱邪脈也若脈緊汗出是少陰寒虛證也今脈緊無汗乃少陰寒實證也因循至七八日之久而自下利若寒實解則脈必緊去而暴微其證必手足由冷而反溫是知邪隨利去爲欲解也故此時雖煩下利乃陰

退陽回故知其必自愈也〔集註〕方有執曰緊寒邪也自下利脈暴微者陰寒內瀉也故謂手足爲反溫言陽回也陽回則陰退故謂緊反去爲欲解也夫寒邪在陰而脈緊得自利脈暴微手足溫緊去爲欲解者猶之邪在陽脈數而熱得汗出脈和身涼數去爲欲愈之意同陰陽勝復之機也 程應旆曰脈於利後頓變緊而爲微手足於利後變不溫而爲溫則微非諸微亡陽之微乃緊去人安之微蓋以從前之寒已從下利而去故陽氣得回而欲解也雖煩下利必自愈少陰病得之一二日口中和其背惡寒者當灸之附子湯主之〔註〕背惡寒爲陰陽俱有之證如陽明病無大熱口渴燥渴心煩背微惡寒者乃白虎加人參湯證也今少陰病但欲寐得之二三日口不燥而和其背惡寒者乃少陰陽虛之背惡寒非陽明熱蒸之背惡寒也故當灸之更主以附子湯以助陽消陰也口渴燥口和誠二者之確徵矣〔集註〕程知曰言初得之證口中和不渴不燥全無裏熱也內經曰背爲陽背惡寒則陽虛陰盛寒深可知若風寒在表而惡寒則一身盡寒矣灸之以助陽消陰與附子湯以溫經散寒論中云傷寒無大熱口渴燥渴心煩背微惡寒者白虎湯加人參主之彼是陽熱乘陰虛而內陷之惡寒與此之陰寒盛者不同陽入陰者則口渴燥心煩陰寒盛者則不能銷鑠津液故口中和 張璐曰太陽表氣大虛邪氣得入犯少陰故得之一二日尚背惡寒不發熱此陰陽兩虧較之兩感更自不同兩感表裏皆屬熱邪猶堪發表攻裏此則內外皆屬虛寒無邪熱可以攻擊惟當溫經補陽以溫補其不足更灸關元以協助之雖其證似緩於發熱脈沉而危殆尤甚焉 汪琥曰此條論仲景不言當灸何穴常器之云當灸兩關元穴背俞第三行郭雍云此有錯字當是灸兩關元穴也兩關是背俞第二行穴按兩關實係背俞部第二行穴然常器之所云第三行穴者當是兩關非兩關也圖經云兩關二穴在第七椎下兩旁相去各三寸陷中正坐取之足太陽氣脈所發專治背惡寒脊強俯仰難可灸五壯蓋少陰中寒必由太陽而入故宜灸其穴又關元一穴在腹部中行臍下三寸足三陰任脈之會可灸百壯常器之所謂灸兩關者是溫其表以散外邪灸關元者是溫其裏以助其元氣也○少陰病身體痛手足寒骨節痛脈沉者附子湯主之〔註〕此承上條詳舉其證互發其義以出其治也身體痛表裏俱有之

證也。如太陽病脈浮發熱惡寒身痛手足熱骨節痛是爲表寒。當主麻黃湯發表以散其寒。今少陰病脈沉無熱惡寒身痛手足寒骨節痛乃是裏寒。故主附子湯溫裏以散寒也。〔集註〕方有執曰少陰腎也腎主骨寒淫則痛程應旄曰身體痛手足寒骨節痛太陽傷寒同有此證也以脈沉辨之沉屬陰寒重著所致裏陰有餘表陽不足故以附子湯主之。

附子湯方

附子二枚生破八片 茯苓三兩

去滓溫服一升日三服

人參二兩

白朮四兩

芍藥三兩

以上五味以水八升煮取三升

〔方解〕少陰爲寒水之藏故寒傷之重者多入少陰所以少陰一經最多死證方中君以附子二枚者取其力之銳且以重其任也生用者一以壯少火之陽一以散中外之寒則身痛自止惡寒自除手足自溫矣以人參爲臣者所以固生氣之原令五臟六府有本十二經脈有根脈自不沉骨節可和矣更佐白朮以培土芍藥以平木茯苓以伐水水伐火自旺旺則陰翳消木平土益安安則水有制制則生化此誠萬全之術也其有畏而不敢用以致因循有誤者不誠可惜哉○少陰病脈沉者急溫之宜四逆湯〔註〕少陰病但欲寐脈沉者若無發熱口燥之證則寒邪已入其藏不須遲疑急溫之以四逆湯消陰助陽可也〔集註〕吳人駒曰脈沉須別虛實及得病新久若得之多日及沉而實者須從別論

四逆湯方

甘草二兩

乾薑一兩

附子一枚生用去皮破八片

以上三味以水三升煮取一升二合去滓分溫再服強

人可大附子一枚乾薑三兩

〔方解〕方名四逆者主治少陰中外皆寒四肢厥逆也君以甘草之甘溫溫養陽氣臣以薑附之辛溫助陽勝寒甘草得薑附鼓舞陽溫中寒有水中煖土之功薑附得甘草通關節走四肢有逐陰回陽之力腎陽鼓寒陰消則

陽氣外達而脈自升手足自溫矣〔集註〕汪琥曰少陰病本脈微細但欲寐今輕取之微脈不見重取之細脈幾亡伏匿而至於沉此寒邪深入於裏殆將入藏溫之不容以不急也稍遲則惡寒身踈吐利煩躁不得臥寐手足逆冷脈不至諸死證立至矣四逆湯之用可稍緩乎○少陰病下利白通湯主之〔註〕少陰病但欲寐脈微細已屬陽爲陰困矣更加以下利恐陰降極陽下脫也故君以葱白大通其陽而上升佐以薑附急勝其陰而緩降則未脫之陽可復矣〔集註〕方有執曰少陰病而加下利者不獨在經而亦在藏寒甚而陰盛也治之以乾薑附子者勝其陰則寒自散也用葱白而曰白通者通其陽則陰自消也程知曰此言下利宜通其陽也少陰病謂有脈微細欲寐證也少陰下利陰盛之極恐致格陽故用薑附以消陰葱白以升陽通云者一以溫之而令陽氣得入一以發之而令陰氣易散也汪琥曰腎虛無火不能主水故下利用白通湯者溫裏以散寒也白通湯方

葱白 四莖

乾薑 一兩

附子 一枚生去皮破八片

以上三味以水三升煮取一升去滓分溫再服

〔集解〕汪琥曰此方與四逆湯相類獨去甘草蓋驅寒欲其速辛烈之性取其驟發直達下焦故不欲甘以緩之也而猶重在葱白少陰之陰天之寒氣亦爲陰兩陰相合而偏於下利則與陽氣隔絕不通薑附之力雖能益陽不能使真陽之氣必入於陰中惟葱白味辛能通陽氣令陰得陽而利庶可愈矣蓋大辛大熱之藥不過藉以益人陽氣非有以通之令真陽和會而何以有濟也耶○少陰病下利脈微者與白通湯利不止厥逆無脈乾嘔煩者白通加豬膽汁湯主之服湯脈暴出者死微續者生〔註〕此承上條詳申其脈以明病進之義也少陰病下利脈微者與白通湯下利當止今利不止而轉見厥逆無脈更增乾嘔而煩者此陰寒盛極格陽欲脫之候也若端以熱藥治寒寒既甚必反格拒而不入故於前方中加人尿豬膽之陰以引陽藥入陰經曰逆者從之此之謂也無脈者言診之而欲絕也服湯後更診其脈若暴出者如燭燼焰高故主死若其脈徐徐微續而出則是真陽漸回故可生也故上條所以纔見下利卽用白通以治於未形誠善法也〔集註〕程知曰此言陰盛格陽用膽汁通

陰法也以白通與之宜乎陽可救今乃利不止反至厥逆無脈則陰邪愈無忌矣乾嘔而煩則陽藥在膈而不入陰矣此非藥不勝病乃無鄉導之力也加人尿猪膽之陰寒則可引薑附之溫入格拒之寒而調其逆此內經從治之法也程應旆曰脈暴出者死無根之陽驤逆諸外也微續者生陽氣漸交陰肯納也

白通加猪膽汁湯方

葱白 四莖

乾薑 一兩

附子 一枚生去皮破八片 人尿 五合

猪膽 一合

以上三味以水三升煮取一升

去滓內膽汁人尿和令相得分溫再服若無膽亦可用

〔方解〕是方即前白通湯加人尿猪膽汁也加尿膽者從其類也下咽之後冷體既消熱性便發情且不違而致大益則二氣之格拒可調上下之陰陽可通矣○少陰病欲吐不吐心煩但欲寐五六日自利而渴者屬少陰也虛故引水自救若小便色白者少陰病形悉具小便白者以下焦虛有寒不能制水故令色白也〔註〕少陰病欲吐不吐心中煩但欲寐五六日自利而渴者此屬少陰傳邪寒熱俱有之證也若是少陰熱而燥乾引水之渴小便必色赤乃少陰燥不能生津下焦有熱也今爲少陰虛而引水自救之渴故小便則色白是少陰虛冷不能化液下焦有寒也於此可知少陰病形悉具而渴者有寒熱二端之別也〔集註〕成無己曰欲吐不吐心煩者表邪傳裏也若腹滿痛則屬太陰此但欲寐則知屬少陰五六日邪傳少陰之時若自利不渴寒在中焦屬太陰也此自利而渴爲寒在下焦屬少陰也腎虛水燥故渴欲引水自救下焦虛寒故小便色白下利而渴小便色白非裏熱可知矣方有執曰此反覆申明曉人勿認煩渴均爲熱證以致誤之意程應旆曰煩證不盡屬少陰故指出但欲寐來渴證不盡屬少陰故指出小便白來結以下焦虛有寒教人上病治在下也蓋上虛而無陰以濟總由下虛而無陽以溫也二虛字皆由寒字得來又曰吐利而渴與猪苓湯證同其別在但欲寐且猪苓證小便必不利而色赤飲水與白頭翁證同彼曰以有熱故也小便亦必不利林瀾曰欲吐不吐心煩陽虛格越於上但欲寐自利小便白裏之真寒已深要知此渴與口燥舌乾之渴不同若兼腹滿便閉譫語諸證自當作陽邪傳裏

治之既裏虛自利小便白其爲虛寒明甚特曰下焦者足見陰既盛於下陽必格於上豈可以煩渴而誤攻其熱哉汪琥曰以全文觀之大似熱證惟小便色白知爲真寒之證此但欲寐與熱邪不同其寐必不昏濁其呼吸必促而細曰屬少陰者以別其非陽邪之渴乃內無津液引水自救之渴試以冷水飲之必不多也細察其小便若色白者此少陰虛寒之證悉具也非熱邪可知矣沈明宗曰此少陰虛寒似乎熱證之辨也世但知四肢厥逆爲虛寒證詎知小便色白乃爲的驗乎吳人駒曰陽明之欲吐則不得寐在少陰則但欲寐引此以爲盛虛之別○少陰病飲食入口則吐心中溫溫欲吐復不能吐始得之手足寒脈弦遲者此胸中實不可下也當吐之若膈上有寒飲乾嘔者不可吐也當溫之宜四逆湯〔按〕溫溫當是溫溫當是溫溫者乃吐飲之狀也〔註〕此承上條欲吐不吐詳別脈證以明其治也飲食入口即吐且心中溫溫欲吐復不能吐惡心不已非少陰寒虛吐也乃胸中寒實吐也故始得之脈弦遲弦者飲也遲者寒也而手足寒者乃胸中陽氣爲寒飲所阻不能通於四肢也寒實在胸當因而越之故不可下也若膈上有寒飲但乾嘔有聲而無物出此爲少陰寒虛之飲非胸中寒實之飲也故不可吐惟急溫之宜四逆湯或理中湯加丁香吳茱萸亦可也〔集註〕程知曰此言少陰飲吐爲腎邪上逆當溫不當吐也欲吐不吐陰邪上逆之證也若始得病時邪未深入其手足但寒而不厥脈但弦遲而不沉細則爲邪實胸中寒尚在表屬於陽分當吐而不當下吐者有物嘔則無物兩者須辨若膈上有寒飲但見乾嘔而不能吐出則是陰寒上逆當溫而不當吐也曰急溫者明不溫則見厥逆無脈諸變證也程應旆曰寒在胸中法不可下而屬實邪但從吐法一吐而氣陽得通吐法便是溫法若膈上有寒飲乾嘔者虛寒從下而上阻留其飲於胸中究非胸中之病也直從四逆湯急溫其下可矣○少陰病脈微細沉但欲臥汗出不煩自欲吐至五六日自利復煩躁不得臥寐者死〔註〕此發明上條互詳脈證失於急溫致變之義也脈微細沉但欲臥少陰寒也當無汗今反汗出不煩乃少陰亡陽也且自欲吐陰寒之邪上逆正當急溫失此不治因循至五六日加之自利復煩躁不得臥寐者此少陰腎中真陽擾亂外越欲絕之死證此時即溫之亦無及矣〔集註〕方有執曰脈微沉細